

- राज्य मंत्रिमण्डल री बैठक मांय केई खास फैसला-अशांत घोषित खेतरां मांय स्थायी निवासियां री सम्पतियां अर किरायेदारां रा हकां री रक्षा खातिर विधेयक लायो जावेला।
- प्रदेश रा काश्तकारां ने काले मुख्यमंत्री किसान सम्मान निधि योजना री पांचवीं किश्त ने ट्रांसफर कर्यो जावेला।
- केन्द्रीय मंत्रिमंडल अटल पेंशन योजना ने बरस 2030-31 ताई जारी राखणे री मंजूरी दी।
- पीएम-कुसुम योजना मांय चोखा काम खातिर-राजस्थान डिस्कॉम्स गोल्ड अवॉर्ड सूं सम्मानित।

000

राज्य मंत्रिमण्डल अशांत घोषित खेतरां मांय स्थायी निवासियां री सम्पतियां अर किरायादारां रे अधिकारां री रक्षा खातिर विधेयक लाणे, एयरोस्पेस अर रक्षा विनिर्माण तथा सेमीकंडक्टर रे खेतर मांय नुवी नीतियां रे अनुमोदन समेत केई महत्ती फैसला करया है। मुख्यमंत्री कार्यालय मांय आज व्ही मंत्रिमंडल री बैठक रे पाछे उद्योग मंत्री कर्नल राज्यवर्धन सिंह राठौड़, संसदीय कार्य मंत्री जोगाराम पटेल अर खाद्य और नागरिक आपूर्ति मंत्री सुमित गोदारा संयुक्त प्रेस वार्ता करी। संसदीय कार्य मंत्री जोगाराम पटेल बतायो कि जनसंख्या असंतुलन रा हालात बणणे सूं सार्वजनिक व्यवस्था, सद्भाव अर मेलजोल सूं रेहणे रो सामुदायिक चरित्र माथे असर पड़े है। ऐड़ा खेतरां मांय दंगा, भीड़ कानी सूं हिंसा सूं अशांति रा हालात पैदा होणे माथे उण खेतर रा स्थायी निवासियां ने आपरी स्थायी सम्पतियां कम दामां माथे बेचणे पर मजबूर होणो पड़े है। इने रोकणे खातिर कानून बणायो जावेला।

-----

श्री पटेल बतायो कि इण विधेयक रे पारित होवण रे पाछे राज्य मांय अशांत घोषित खेतर मांय स्थाई निवासियां री सम्पतियां अर आं सम्पतियां माथे किरायेदारां रे अधिकारां ने संरक्षण प्रदान करयो जा सकेला। इण विधेयक ने अबे विधानसभा रा आवता सत्र मांय राख्यो जावेला। उद्योग अर वाणिज्य मंत्री श्री राठौड़ बताया कि कैबिनेट रक्षा अर अंतरिक्ष प्रौद्योगिकी ने प्रोत्साहन देणे रे साथे प्रदेश ने एयरोस्पेस अर डिफेन्स मैनुफैक्चरिंग रो हब बणाणे रे लगस सूं राजस्थान एयरोस्पेस एण्ड डिफेन्स पॉलिसी रो अनुमोदन करयो है। एमएसएमई, स्टार्टअप्स अर नवाचार आधारित इकोसिस्टम ने विकास माथे केन्द्रित इण नीति रे तैत प्रदेश मांय एयरोस्पेस एण्ड डिफेन्स खेतर रे विनिर्माण उद्यमां, उपकरण अर घटक निर्मातावां सूं जुड़ी इकाइयां ने बधावो दियो जावेला।

-----

कर्नल राठौड़ बताया कि कैबिनेट प्रदेश री पहली राजस्थान सेमीकंडक्टर पॉलिसी ने भी मंजूरी दी है। आ राज्य को सेमीकंडक्टर विनिर्माण, डिजाइन, पैकेजिंग अर संबद्ध इलेक्ट्रॉनिक्स रे खेतर मांय देश रो प्रमुख केन्द्र बणाणे री दिशा मांय महत्ती कदम है।

खाद्य अर नागरिक आपूर्ति मंत्री सुमित गोदारा बतायो के काश्तकारां अर पशुपालकां ने न्यारी-न्यारी कल्याणकारी योजनावां रो लाभ देवण खातिर प्रदेश हर गिरदावर सर्किल माथे 23 जनवरी सूं ग्राम उत्थान शिविरां रो आयोजन करेला। श्री गोदारा बतायो कि मंत्रिमंडल ने सौर परियोजनावां खातिर बीकानेर अर जैलसमेर मांय भूमि आवंटन ने भी मंजूरी दी है। वणा बतायो कि 23 जनवरी ने बसंत पंचमी माथे प्रदेश रा सगळा सरकारी स्कूलां मांय एक साथे मेगा पीटीएम रो आयोजन करयो जावेला।

000

कैबिनेट रा फैसलां माथे प्रतिक्रिया जताता थकां प्रदेश कांग्रेस अध्यक्ष गोविंद सिंह डोटासरा कयो कि अशांत क्षेत्र घोषित करणे संबंधी कानून लाणे रो राज्य मंत्रिमंडल रो फैसलो समानता रे अधिकार रो उल्लंघन होगा। वणा कयो कि ऐडो करणे सूं ब्यूरोक्रेसी निरंकुश व्हेला अर वठे रा नागरिकां रे साथे न्याय नी हो पावेला।

000

राज्य विधानसभा रो बजट सत्र 28 जनवरी सूं होणे जा रियो है। विधानसभा अध्यक्ष वासुदेव देवनानी इण सत्र ने खासो महत्ती बताता थकां कयो कि सदन ने सुचारू रूप सूं चलावण अर सकारात्मक चर्चा खातिर सत्ता पक्ष अर विपक्ष रा सदस्यां सूं चर्चा करीजी। श्री देवनानी कयो कि सत्र री तैयारियां ने लेर 27 जनवरी ने कार्य सलाहकार समिति री बैठक बुलाई जी।

000

राज्य रा काश्तकारां खातिर काले मुख्यमंत्री किसान सम्मान निधि योजना री पांचवीं किश्त रो ट्रांसफर करयो जावेला। इण मौके माथे राज्य स्तरीय कार्यक्रम सिरोही मांय राख्यो जावेला, जदके जयपुर रो जिला स्तरीय किसान सम्मेलन एचसीएम रीपा व्हेला। सम्मेलन रे चालता काश्तकारां ने योजना री किश्त रो लाभ ट्रांसफर करणे रे साथे ही ग्राम उत्थान शिविरां रे बारा मांय भी जाणकारी दी जावेला। ब्लॉक अर पंचायत स्तर माथे भी इणी भांत रा कार्यक्रम राख्या जावेला।

000

केन्द्रीय मंत्रिमंडल आज अटल पेंशन योजना ने बरस 2030-31 ताई जारी राखणे रे साथे ही प्रचार अर विकासात्मक गतिविधियां खातिर वित्तीय सहायता बधाणे ने मंजूरी दे दी है। इण योजना रे तैत अबे ताई आठ करोड़ 66 लाख सूं बत्ती लाभार्थी पंजीकृत हो चुक्या है। आज नुवी दिल्ली मांय प्रधानमंत्री नरेंद्र मोदी री अध्यक्षता मांय व्ही मंत्रिमंडल री बैठक मांय ओ फ़ैसलो लियो है। आ योजना मई 2015 मांय असंगठित खेतर रे मजूरां ने वृद्धावस्था मांय आय सुरक्षा प्रदान करणे रे लगस सूं सरू करीजी ही। आ योजना 60 बरस री आयु प्राप्त करणे रे पाछे हर म्हीने एक हजार सूं पांच हजार रुपया ताई री न्यूनतम गारंटीकृत पेंशन देवे है, आ लाभार्थी रे योगदान माथे भी निर्भर करे है।

000

लखनऊ मांय आयोजित अखिल भारतीय पीठासीन अधिकारी सम्मेलन आज पूरो व्हीयो। समापन सत्र मांय बोलता थकां लोकसभा अध्यक्ष ओम बिरला कयो कि विधायी निकायां ने जनता रे प्रति बत्ती उत्तरदायी बणाये जावण खातिर जतन कर्या जा रिया है। सम्मेलन मांय संकल्प लियो गयो कि राज्य विधानसभावां री बरस मांय कम सूं कम 30 बैठकां पक्की करी जावे। श्री बिरला बतायो कि विधायी कामां रा मूल्यांकन खातिर एक 'राष्ट्रीय विधाई सूचकांक' तैयार कर्यो जावेला।

000

मुख्य निर्वाचन आयुक्त ज्ञानेश कुमार कयो है कि बूथ लेवल अहलकार, देश मांय चुणाव आधारित लोकतांत्रिक व्यवस्था रा स्तंभ है। आज नुवी दिल्ली मांय राखी ज्या भारतीय अंतर्राष्ट्रीय लोकतंत्र अर चुनाव प्रबंधन सम्मेलन मांय बोलता थकां श्री कुमार भारत ने लोकतंत्र री जननी बतायो। वणा कयो कि हर पात्र मतदाता ने भेळो करता व्हीया निष्पक्ष मतदाता सूची बणाये राखणो लोकतंत्र ने मजबूत करणे खातिर जरूरी है क्योंकि इण रे जरिए सगळा चुणाव निष्पक्ष तरीके सूं होवे है।

श्री कुमार कयो कि लारला कुछ एक दशकां मांय चुणाव प्रबंधन निकायां रे संचालन मांय खासो विकास व्हीयो है।

000

राजस्थान डिस्कॉम्स ने पीएम-कुसुम योजना रे तैत चोखे काम खातिर गोल्ड अवॉर्ड सूं सम्मानित कर्यो गयो है। नुवी दिल्ली मांय राखी ज्या ऑल इण्डिया डिस्कॉम्स एसोसिएशन रा सालाना जळसा मांय केंद्रीय विद्युत मंत्री मनोहर लाल डिस्कॉम्स री अध्यक्ष आरती डोगरा ने ओ पुरुस्कार दियो। प्रदेश मांय इण योजना रे जरिये अबे ताई एक हजार 307 सौर ऊर्जा संयंत्र थापित कर्या ज्या चुक्या है। इण सूं एक लाख 41 हजार सूं बत्ती काश्तकारां ने खेती रे काम खातिर दिन मांय बिजली मिळ री है। ऊर्जा मंत्री हीरालाल नागर इण उपलब्धि माथे महकमा रा कार्मिकां ने बधाई दी। वणा कयो कि राज्य ऊर्जा खेतर मांय आत्मनिर्भरता री कानी बध रियो है।

000

गृह राज्य मंत्री जवाहर सिंह बेढम आज प्रदेश भाजपा कार्यालय मांय समस्यावां सुणी। सुणवाई रे चालता भरतपुर सूं आया कांग्रेस कार्यकर्ता सतीश पांडे भी परिवेदना रखी, जिण माथे मंत्री अहलकारां ने समाधान रा हुकम दिया। मीडिया सूं बणतळ मांय श्री बेढम कयो कि सरकार नागरिकां री समस्यावां रे निस्तारण खातिर जवाबदेही रे साथे काम कर री है।

000

राज्यपाल अर कुलाधिपति हरिभाऊ बागडे कयो है कि उच्च शिक्षा मांय गुणवत्ता सूं समझौतो नी कर्यो आवेला अर मानक पूरा नी करण वाळे संस्थानां ने बंद करणे री नीति माथे काम व्हेला। आज जयपुर मांय कुलगुरु समन्वय समिति री बैठक मांय बोलता थकां वणा विश्वविद्यालयां ने हर साल ऑडिट करणे रा हुकम दिया। राज्यपाल विश्वविद्यालयां मांय विद्यार्थी-अध्यापक संवाद सरू करणे अर भारतीय ज्ञान परंपरा रो दरसाव करण री पहल माथे जोर दीयो। उपमुख्यमंत्री प्रेमचंद बैरवा बैठक मांय बतायो कि खाली पदां ने भरण खातिर रोस्टर प्रणाली माथे काम करयो जा रियो है। बैठक मांय दीक्षांत जळसा ने सादगी सूं राख्या जावे अर गांवां ने गोद लेर विकास रा काम करणे रा हुकम दिया।

000

भरतपुर एमएसजे खेल मैदान मांय आज युवा सम्बल मेळो राखी ज्यो। इण मेळे मांय राजस्थान समेत नोएडा, दिल्ली, उत्तरप्रदेश अर मध्यप्रदेश री 45 कंपनियां भाग लियो। मेळा मांय आठवीं कक्षा सूं लेर आईटीआई, बीटेक अर उच्च शिक्षा प्राप्त करीब चार हजार अभ्यर्थी आवेदन कर्यो।

कंपनियां प्रतिनिधियां ने साक्षात्कार रे पाछे पात्र युवावां ने मौके माथे ही नियुक्ति पानो सौंप्यो। संभागीय आयुक्त नलिनी कठोटिया अर जिला कलेक्टर कमर चौधरी मेळा रो जायजो कर र युवावां सूं बणतळ करी। इण रे चालता केंद्र अर राज्य सरकार री जनकल्याणकारी योजनावां री जाणकारी खातिर प्रदर्शनी भी लगायी ज्यी।

000

प्रधानमंत्री नरेन्द्र मोदी 25 जनवरी ने आकाशवाणी रे “मन की बात” कार्यक्रम मांय आपरा विचार साझा करेला। आ इण मासिक रेडियो कार्यक्रम री 130वीं कडी व्हेला। इण रे खातिर सुझाव टोल-फ्री नम्बर 1800-11-7800 माथे भेज्या जा सके है। नरेन्द्र मोदी एप अर माय जीओवी ओपन फोरम रे माध्यम सूं भी विचार भेज्या जा सके है। ऐ सुझाव 23 जनवरी ताई मंजूर कर्या जावेला।

000